

Акафист святым безсребренником и чудотворцем Косме и Дамиану Ассийским

Кондак 1

Избраннии чудотворцы, страстотерпцы Христовы и врачеве премудрии, туне подающийи здравие в болезнех сущим, похвальная восписуем вам, заступником нашим и в скорбех помощником: вы бо сосуди благодати суще, исцеляете душевныя и телесныя наша язвы. Темже славяще Бога, дивнаго во святых Своих, вас усердно ублажаем: Радуйтесь, Космо и Дамиане, святии безсребренницы и преславнии чудотворцы.

Икос 1

Ангельскому жительству поревновавше, вся земная презрели есте и, подвигом мученичества венчавшеся, лицезрения Господа сил сподобилися есте. Молитесь убо за ны прилежно, к помощи вашей притекающих и похвальная вам вопиющих: Радуйтесь, молитвенницы теплии о чтущих святую память вашу; Радуйтесь, оставленных врачами неоскудно исцеляющи. Радуйтесь, яко дом, имение и вся родителей стяжания ни во чтоже вменили есте; Радуйтесь, нищия милосердием вашим препитавшии. Радуйтесь, страждущия сердоболием утешавшии; Радуйтесь, чистотою и святостию Ангелом уподобившиися. Радуйтесь, светильницы Божественнаго света; Радуйтесь, небеснии человецы, земнии Ангели. Радуйтесь, яко христианом есте прибежище непостыдное; Радуйтесь, все житие свое даже до последняго издыхания в служении Господу истощившии. Радуйтесь, всесветлое благодати приятелище, Духа Святаго сосуди; Радуйтесь, всем, призывающим вас, скории помощницы. Радуйтесь, Космо и Дамиане, святии безсребренницы и преславнии чудотворцы.

Кондак 2

Видя Господь Бог добрая ваша начинания и велие ко благочестию усердие ваше, яко вся земная и благая мира сего уметы вменивше, в непрестаннем труде любве ради ближняго пребысте и души своя благими нравами украсили есте, преисполни вас Духа Святаго, Егоже лучею озаритися и нам испросите у Христа Бога, да купно с вами поем Ему: Аллилуиа.

Икос 2

Разумом истиннаго богопознания царя нечестиваго научили есте, вразумив того силою словес ваших, имиже дерзновенно Христа

проповедаете. Темже дерзновение ваше похваляюще, взываем сице: Радуйтесь, лестию нечестиваго царя не уловеннии; Радуйтесь, истину Христову дерзновенно пред ним исповедавшии. Радуйтесь, прещения его не убоявшиися; Радуйтесь, нечестивых соборища посрамившии. Радуйтесь, небоязненнии проповедницы истины; Радуйтесь, служения идольскаго потребителие. Радуйтесь, веры православныя поборницы; Радуйтесь, исповедницы непоколебимии, духа терпения и ревности о славе Божией исполненнии. Радуйтесь, немолчнии велений Господних провозвестницы; Радуйтесь, вернии наставницы богомудрия. Радуйтесь, Царствия Христова надежднии нам ходатаи; Радуйтесь, и по смерти вашей нас не оставляющии. Радуйтесь, Космо и Дамиане, святии безсребренницы и преславнии чудотворцы.

Кондак 3

Силою Вышняго, данною вам еще во временней жизни, прияли есте власть чудесно исцеляти всякия недуги; по смерти же вашей наипаче прослави вас Бог многими чудотворении, да вси притекаим к вам, молящися о исцелении от недугов телесных, паче же душевных, и Богу велегласно вопием: Аллилуиа.

Икос 3

Имуще, яко многоценное сокровище, многоцелебныя мощи ваша, радуемся и, любовию воспевающе данную вам от Бога благодать исцелений, благодарно зовем: Радуйтесь, теплии о нас к Богу предстателие; Радуйтесь, еллинская мудрования ни во чтоже вменившии. Радуйтесь, Рима светильницы всесветлии; Радуйтесь, омраченных стран просветителие. Радуйтесь, мужества и терпения наставницы; Радуйтесь, яко неповинне каменное побиение претерпевше, кончину мученическую улучили есте. Радуйтесь, любве ради Христовы пострадавшии, и нас небесных благ причастники примите; Радуйтесь, раби Божии, от Господа Христа венцы победы приемшии. Радуйтесь, дивный и прекрасный смирения и кротости образ всем показавшии; Радуйтесь, непоколебимое православия основание. Радуйтесь, светлая страстотерпцев славо; Радуйтесь, добрии целебницы, ни от когоже мзды за исцеления взявшии. Радуйтесь, Космо и Дамиане, святии безсребренницы и преславнии чудотворцы.

Кондак 4

Буря ярости велия царя Карина не возможе поколебати души вашей, и егда вернии в некоей пещере вас скрыта от яти вас ищущих, волею

воином предстали есте, вопиюще: нас поимите, мы бо есмы ихже ищите, неповинных же отпустите. Таже веригами обложени бывше, в Рим отведостесе. Мы же, веру вашу и вериги лобызающе, поем Богу: Аллилуиа.

Икос 4

Слышавше римстии людие велию вашу ко страждущим любовь и чудесное врачевание ваше, отвсюду устремляхуся к вам с верою в целебную благодать Божию, в вас действующую; приемлюще же скорое исцеление, прославляху Бога, вас же, милосердых целителей своих, величаху, воспевая сице: Радуйтесь, Бога истиннаго непреборимии проповедницы; Радуйтесь, оружие креста Христова добропобедно взявшии. Радуйтесь, блазии врачеве, страждущим скории помощницы; Радуйтесь, вся немощныя туне врачующии. Радуйтесь, и ныне исцеления обильно источающии; Радуйтесь, милостивии утешителие в бедах и скорбех сущим. Радуйтесь, во всяких обстояниих нас защищающии; Радуйтесь, беспомощных спасительное призрение. Радуйтесь, праведных преславное украшение; Радуйтесь, предстательство наше крепкое. Радуйтесь, прилежнии о нас к Богу молитвенницы; Радуйтесь, всем, верою призывающим вас, скории помощницы. Радуйтесь, Космо и Дамиане, святии безсребренницы и преславнии чудотворцы.

Кондак 5

Боготечным воистинну путем шествовасте, раби Христовы, егда во узах в Рим ведоми, за еже идолом не послужисте, Христови же единому поработасте, горькая испытанья терпели есте, святии; но вся претерпесте за возлюбльшаго вас Христа. Темже великому терпению и крепцей любви вашей ко Господу дивящесе, купно с вами поем Ему: Аллилуиа.

Икос 5

Видев царь, яко силою Христовою исцеле, хвалу Тому воздаде; мы же, славяще Бога, ублажаем вас, славных угодников Его, вопиюще сице: Радуйтесь, горняя паче дольних возлюбившии; Радуйтесь, ангельскому житию на земли поревновавшии. Радуйтесь, яко, многобожие отринувше, родительскаго благочестия не отступили есте; Радуйтесь, яко вся имения своя, по словеси Господню, нищим раздали есте, да Христа приобрящете. Радуйтесь, не словом точию, но множае паче делом и непрестанною к Богу молитвою иных поучившии; Радуйтесь, неоскудный источник исцелений и ныне

являющими. Радуйтесь, изливанием чудес, данных вам от Бога, нас обогащающими; Радуйтесь, в самих себе храм Богу уготовавшии. Радуйтесь, скорое нищих услышание; Радуйтесь, скорбных приятное попечение. Радуйтесь, ненадежных известное надеяние; Радуйтесь, болящих скорое врачевание. Радуйтесь, Космо и Дамиане, святии безсребренницы и преславнии чудотворцы.

Кондак 6

Проповедницы имене Христова в животе своем бывше, и ныне силу того свидетельствуете чудесы, от иконы вашей источаемыми, и якоже веры иногда жены некия не презрете, но во сне явльшися ей, облегчение в недуге даровали есте; сице и наших молений и пений гласы услышите, о, святии безсребренницы! Вере же и любви людей ваших внимлите и покров нам свыше даруйте, хвалящим вас и поющим Богу: Аллилуиа.

Икос 6

Возсия, яко свет, правда ваша, егда укоряема на судищи царя, дерзновенно рекосте к нему: не волшебною хитростию врачуем болезни, но силою Спаса нашего Иисуса Христа, якоже Той заповеда, глаголя: болящия исцеляйте, прокаженныя очищайте, туне приясте, туне дадите. Темже дерзновению вашему дивящися, ублажаем вас сими: Радуйтесь, образ твердости и веры нам показавшии; Радуйтесь, райския радости присно наслаждающися. Радуйтесь, премудрии сеятелие благочестия; Радуйтесь, славнии проповедницы православия. Радуйтесь, учителие, к небеси наставляющии; Радуйтесь, чистаго и непорочнаго жития неусыпнии хранителие. Радуйтесь, теплии послушателие молящихся вам; Радуйтесь, ко спасению изящнии и вернии путеводителие. Радуйтесь, благочестно и богоугодно жити хотящим блазии наставницы; Радуйтесь, ходатаи благих всем, почитающим память вашу. Радуйтесь, добре течение свое скончавшии;

Радуйтесь, венцы правды от Владыки Христа приявшии. Радуйтесь, Космо и Дамиане, святии безсребренницы и преславнии чудотворцы.

Кондак 7

Хотяще силу Христову злочестивому царю открыти, Духа Святаго исполнени рекосте: буди посрамлен, о Карине, и с богами твоими! И абие ему лице изменися, и выя совратися, и, молящися к вам, глаголя: се ныне вижду, яко раби есте истиннаго Бога. Молю убо вас, да якоже

иных уврачевасте, сице исцелите и мене, да и аз купно с вами воспою Богу: Аллилуиа.

Икос 7

Дивнии о нас молитвенницы, целителие душ и телес наших и ходатаи спасения вечнаго, благодарным сердцем воспевающе хвалебную песнь Богу, даровавшему нам таковых великих чудотворцев, приносим и вам похвалы сицевыя: Радуйтесь, Ангелов терпением вашим удивившии; Радуйтесь, божественным сиянием чудес своих вся просветившии. Радуйтесь, скории от всяких болезней и безмезднии врачеве; Радуйтесь, заступлением вашим расслабленныя исцеляющи. Радуйтесь, от неисцельных болезней здравы воздвизающи; Радуйтесь, достойне совершившии земный подвиг жития вашего. Радуйтесь, о нас, обнаженных добрых дел, присно к Богу предстательствующи; Радуйтесь, яко сиянием премудрости, от Господа вам данныя, всех верных просвещаете. Радуйтесь, молитвенницы о нас и заступницы наши предивнии; Радуйтесь, доблии страстотерпцы Христовы. Радуйтесь, кровми своими землю освятившии; Радуйтесь, идольское безумие обличившии. Радуйтесь, Космо и Дамиане, святии безсребреницы и преславнии чудотворцы.

Кондак 8

Странное мирови житие ваше видяще, устранимся и мы того сует и, ум на небеса преложше, возопиим к вам, святии безсребреницы: утолите болезни, источая благодатная врачевания всем, усердно к помощи вашей притекающим и вопиющим Богу: Аллилуиа.

Икос 8

Все житие ваше на земли любовию к Богу и к ближним исполнивше, святии безсребреницы Космо и Дамиане, скории и ныне помощники являетесь всем, с верою призывающим вас; не точию бо близ притекающим ко святым мошем вашим, но и далече сущим исцеления источаете. Темже приносим вам похвалы сия: Радуйтесь, Единому Богу, в Троице славимому, верно послужившии; Радуйтесь, единое еже на потребу премудро избравшии. Радуйтесь, яко в неустанном труде и подвизе дни и нощи ваша без всякаго уныния препроводили есте; Радуйтесь, яко ситцевым вашим тесным и скорбным житием славу Божию в человецех умножили есте. Радуйтесь, доблии Христовы последователие; Радуйтесь, яко научители и творцы Христовых заповедей явилися есте. Радуйтесь, яко именами велиих в Царствии Небеснем наречени бысте; Радуйтесь, славою Христовою

весь мир озаривши. Радуйтесь, яко страданием вашим безстрастие прияли есте; Радуйтесь, яко мученическую смертью безсмертие стяжали есте. Радуйтесь, яко Ангели, на небеси и на земли прославленнии; Радуйтесь, яко Богу ныне венценосни предстоите. Радуйтесь, Космо и Дамиане, святии безсребреницы и преславнии чудотворцы.

Кондак 9

Всякое естество человеческое удивися сиянию в вас благодати Божией, святии Космо и Дамиане, егда нечестивый царь Карин, узрев чудеса, от имени Господа Иисуса Христа вами творимая, уверова и прослави Бога. Темже и мы, славяще давшего вам сицевую силу, поем Ему: Аллилуиа.

Икос 9

Вития многовещанная недоумеют довольно изобразити обилие любви вашей, еуже преисполнены бысте, святии угодницы, к человеком о Господе. Сего ради из глубины сердец наших вопием к вам: Радуйтесь, Господу своему даже до смерти поработавшии; Радуйтесь, огнем любви Божия воспламени, огонь жертв идольских угасившии. Радуйтесь, ближнего паче самих себе возлюбившии; Радуйтесь, яко болящия и недужныя посещали есте. Радуйтесь, нужды убогих предварявшии; Радуйтесь, печальных утешителие. Радуйтесь, отчаянных заступницы; Радуйтесь, сирых питателие. Радуйтесь, люте страждущим помощницы; Радуйтесь, угнетенных свободителие. Радуйтесь, яко, добре течение скончавше, ко Христу вознесостесь; Радуйтесь, яко в Царствии Его водворяетесь. Радуйтесь, Космо и Дамиане, святии безсребреницы и преславнии чудотворцы.

Кондак 10

Спасти хотя многия, яви нам Господь вы, чудотворцы Своя: кто бо не умилился, видя ваше безмерное ко всем сострадание; кто ли вы не ублажит, яко не токмо человеки от недуг исцеляете, но и скоты милуете; не отрините убо и наших молитв, но на вся ны неоскудно великия и богатая ваша милости излейте, да вопием Богу: Аллилуиа.

Икос 10

Стены есте всем, похваляющим чудеса ваша, о безмизднецы, и к заступлению вашему прибегающим; стены и забрала есте, ограждающия от всех бед, усердно в помощь вас призывающим. Темже убо и нас от нищеты, напастей, недугов и скорбей оградите,

молимся и тепле вопием к вам: Радуйтесь, адамантов крепость в терпении превозшедшии; Радуйтесь, неповинно от зависти сребролюбца пострадавшии. Радуйтесь, славнии в бедах заступницы; Радуйтесь, немощных и обидимых укрепление. Радуйтесь, крепцыи в напастех защитителие; Радуйтесь, убогих и нищих всещедрии обогатителие. Радуйтесь, алчущих милостивии кормителие; Радуйтесь, болезными и тяжкими недуги одержимых премудрии урочевателие. Радуйтесь, с верою к вам притекающим от всех скорбных обстояний теплии защитителие; Радуйтесь, яко память ваша всеми славима на земли. Радуйтесь, яко имена ваша написана суть на небесех; Радуйтесь, яко от Бога препрославлени есте. Радуйтесь, Космо и Дамиане, святии безсребреницы и преславнии чудотворцы.

Кондак 11

Пение всеумиленное, ныне нами приносимое, несть довольно к похвалению преславных подвигов и трудов ваших, яже Христа ради подъяли есте в животе своем; обаче дерзающе просим, усердное моление наше приемше, и нас от бед своими молитвами избавите, да умиленным сердцем воспоим Богу: Аллилуиа.

Икос 11

Светозарный и небесный ум явили есте иногда пред Карином, заблуждение того обличая; ныне же нетлением мощей ваших и множеством чудес православие утверждаете. Темже благодарственно зовем: Радуйтесь, Ипостасное Слово дерзновенно проповедавшии; Радуйтесь, силу идольскую добропобедно упразднившии. Радуйтесь, яко вами попрося служение бесом; Радуйтесь, яко вами поклонение Христу проповедася. Радуйтесь, учителяе премудрии; Радуйтесь, всех добродетелей неленостные исполнителие. Радуйтесь, яко по трудех земных в селениих небесных ликовствуете; Радуйтесь, яко и по преставлении своем нас не оставляете. Радуйтесь, яко всем, с верою призывающим вас скорую помощь подаете; Радуйтесь, святии врачеве, яко болезни наша исцеляете. Радуйтесь, молитвы верных не отречающии; Радуйтесь, и о нас недостойных у Престола Божия ходатайствующии. Радуйтесь, Космо и Дамиане, святии безсребреницы и преславнии чудотворцы.

Кондак 12

Благодать, юже даде вам Господь Бог, целити вся недуги душевныя же и телесныя, днесь собра нас, да почтим память вашу, святии безсребреницы Космо и Дамиане, благоговейно убо взирающе на

честную икону вашу и со умилением сердца к ней припадающе, молим избавитися всем нам от всяких зол и болезней, да воспоем вси Богу: Аллилуиа.

Икос 12

Поюще чудеса ваша, восхваляем труды и подвиги, ублажаем мученическую кончину, почитаем ходатайство и сильное заступление ваше о всех, требующих помощи вашей; величаем подателя всех благ Бога, даровавшего нам толико дивных молитвенников, и со умилением зовем: Радуйтесь, Иисуса Господа верно проповедавшии; Радуйтесь, истины Его доблии свидетелие. Радуйтесь, теплии о нас у Престола Его предстатели; Радуйтесь, телес наших благосострадательнии врачеве. Радуйтесь, Царствия Небеснаго и вечных благих наследницы; Радуйтесь, по Бозе все наше упование. Радуйтесь, миро благовонное исцелений источающии; Радуйтесь, страстей злосмрадие молитвами своими отревающии. Радуйтесь, исцелений дательие и чудес источницы; Радуйтесь, светоноснии столпи церковнии и забрала недвижимая. Радуйтесь, винограда истинного божественныя лозы; Радуйтесь, двоице световидная мудрых безсребренников. Радуйтесь, Космо и Дамиане, святии безсребренницы и преславнии чудотворцы.

Кондак 13

О предивнии безсребренницы, чудотворцы, целителие и славнии угодницы Божии, Космо и Дамиане, примите моления сия наша, от сокрушеннаго сердца возносимая; исцелите многообразныя недуги наша и теплым предстательством вашим испросите нам от Христа Бога избавление от всех бед и напастей, прощение прегрешений наших и благую надежду вечнаго спасения, да сподобимся с вами и со всеми святыми в безконечныя веки воспевати Богу, Спасителю нашему: Аллилуиа.

(Этот кондак читается трижды, затем икос 1 и кондак 1)